

欽  
定  
全  
唐  
文

欽定全唐文卷二百二十三目錄

張說三

讓封燕國公表

爲建安王讓羽林衛大將軍兼檢校司賓卿表

爲薛稷讓官表

爲郭振讓官表

爲僧普潤辭公封表

進渾儀表

進佛像表

進舊州鬪羊表

舉陳寡尤等表

舉陳光乘等表

賀祈雨感應表

賀示厯書表

賀大衍厯表

集賢院賀太陽不虧表

禮儀使賀五陵祥瑞表

請許王公百官封太山表

請八月五日爲千秋節表

請置屯田表

駁行用魏徵注類禮表

爲建安王謝賜衣及藥表

謝觀唐昌公主花燭表

荊州謝上表

岳州刺史謝上表

謝修史表

謝賜碑額表

謝問表

謝賜藥表

謝賜鍾馗及歷日表

謝京城東亭子宴送表

郊祀燔柴先後奏

諫避暑三陽宮疏

諫潑寒胡戲疏

欽定全唐文卷二百二十三

張說三

讓封燕國公表

臣說言伏奉今月七日制書封臣燕國公食封三百戶寵靈猥及中心如憚臣說中謝臣聞至道之時重法守義上無無功之賞下無無德之祿故授受禮全而踰越不起伏惟陛下光撫寓內大寧天域百度維新萬靈翹注建侯疏壤允荅元功臣亦何人首膺是命自古有傳道而爵說經而封蓋以訓蒙成聖資師通學臣之侍講有異前聞何者

大明朝昇螢爝無助時雨夕濡浸灌焉施幸得依附光景  
游泳恩渥豈敢虛承啟發之恩謬荷將就之報且如人臣  
之義二則爲罪愚智之分一心不回譬如犬馬有不背之  
性草木有不凋之理知何德於天壤而欲蒙造化之偏施  
哉臣之無功正與此類叨恩過量終懼且慙乞回聖慈以  
容介節無任惶悚之至謹詣朝堂奉表陳讓以聞

爲建安王讓羽林衛大將軍兼檢校司賓卿表

臣某言伏承月日勅書除臣右羽林衛大將軍兼檢校司  
賓卿朝榮對及恩露洪垂罄仰驚抃環揆慙失臣某頓首

頓首臣席慶皇枝辱司天衛素官成責久盈人口頃屬山  
戎自擅王師震加謬當推轂之禮竟空汗馬之績實賴睿  
謨幽贊靈兵潛討滅犬羊於遼海卷旌麾於燕薊臣得歸  
功北闕待罪東藩沐沐休貺生死榮幸安敢賣要塞而告  
勞貪天功以爲己又況羽林清禁上則星辰主客命卿下  
法河海蓋文武具美方議望僉歸豈臣弊劣所堪尸忝伏  
乞特迴睠鑒更擇能賢俾朝興薪樞之歌臣免伐檀之刺  
非敢飾讓實披誠請無任悚戴之至謹詣朝堂奉表陳讓  
以聞



爲薛稷讓官表

臣稷言伏奉制書除臣工部尚書寵靈俯逮營魄震飛揣分何階戴恩無力臣某中謝臣才乏濟川功微橫草故以業承薪構澤潤葭莩效雕蟲之薄技蒙金螭之榮飾徒參進對愧無好詞頃以冗職東垣暫諧清曠今若統司南省將招素餐五翟之正典事斯重六官之長求人未易以臣叨授實爲非宜願寢前恩致命他士無任悚懼之至謹詣朝堂奉表陳讓以聞臣所讓人別狀封進

爲郭振讓官表

臣某言臣本書生幸事先帝歷踐清職遂參機密宗武樹  
黨忿疾正人猜忌眉睫構結瘡痍臣與一二貞士指天誓  
心枝梧羣邪扞城王室曉入宮省暮不望歸艱危備嘗幾  
不免禍日覲一日以逢開泰臣之宿圖今已足矣陛下寶  
位旣復元良又定凶讎咸翦百度惟新正宜博採屠釣大  
變風俗豈臣微才空忝重任外不厭於衆望內實畏於多  
言臣父年老先嬰風疾五月以來不離枕席臣方寸已亂  
短效無施夙夜在公扶持有闕乞免官秩歸侍私庭罄心  
仰恩期於孝治無任懇迫之至

爲僧普潤辭公封表

僧普潤言伏奉甲寅制書以普潤加榮沐秩授邑封公聖恩無涯將變枯朽佛法有教誠願住持普潤自剃落壞衣五十餘載心不見是口不言俗因誠證業憑禪悟理幸逢皇祚將啟大運有歸皇太子逼畏凶讎永懷興復憂虞之際始蒙顧問貧道起廣救之悲決必成之策奉符命之旨贊無畏之心今得衆生乂安羣魔消伏在於法侶所願爲多視身本無何功受祿天位有德陛下享之天討有罪太子行之豈貪天之功以爲己力賣佛之法而求身利必若

冒榮背律返俗違真亦恐乖陛下崇信之誠失如來付屬之義凡所稱述諸佛證明伏惟聖慈亦垂開領乞停恩授以幸法門無任護戒傳道之至願謹詣朝堂奉疏陳情以聞

### 進渾儀表

臣說言臣聞迎日授時莫先於厯象先天成務必歸於制作伏惟開元神武皇帝陛下建中立極緯武經文至德難名神功莫測於是定厯成歲立象考天紹唐堯欽若之典遵虞舜在璿之義上皇能事於斯備矣臣書院先奉勅造

游儀以測七曜盈縮去年六月造畢進奏又奉恩旨更立  
渾儀臣等準勅令左衛率府長史梁令瓚檢校創造於是  
博考傳記舊有張衡陸績王蕃錢樂之等並造斯器雖渾  
體有象而不能運行事非經久旋亦毀廢臣今按據典故  
鑄銅爲儀圓以象天使得俯察上具列宿赤道周天度數  
注水激輪令其自運一日一夜天轉一周又別立二周輪  
絡在天外綴以日月令得運行每天轉一匝日行一度月  
行十三度十九分度之七凡二十九轉有餘而日月會三  
百六十五轉而行匝仍置水櫃以爲地平令儀半在地上

半在地下晦朔弦望不差毫髮又立二木人於地平之上  
前置鍾鼓以候辰刻每一刻則自然擊鼓每一辰則自然  
撞鍾皆於櫃中各施輪軸鉤鍵交錯關鎖相持轉運雖同  
而遲速各異周而復始循環不息陰陽不能逃其數分至  
不能隱其時究天地之幹運極乾坤之變化斯皆上稟聖  
謨傍獲神助臣等愚思非所能及望錄付史館宣示百僚  
使知告成之功迴越前古無任勤懇之至謹隨表上進以  
聞臣說誠惶誠懼

進佛像表

臣說言去年行塞至朔州忍辱尼寺見有高祖太宗造金像銀趺刻題尊號彼州士女屢瞻佛光臣懇思聖心如在咫尺伏以皇帝事業遠存荒塞拯溺救焚身勤慮苦歸誠佛寶何神不據信知功遍區域澤周生人心憑神靈躬履危險故皇天眷命奄有邦家後嗣聖人欽承大寶所當思由積德而興帝系本艱難而成王業先聖一心奉佛者蓋爲百姓求福也陛下爲繼文之主實創業之功再廓氛祲重安廟社垂統萬億同符祖宗夫惟興王必籍佐命咸有一德克享天心書曰非天私我有商惟天佑于一德非商

求于下民惟民歸于一德功臣同德可不念哉物有小而感深事有微而傳遠臣謹將金像隨表奉進謹言

進舊州鬪羊表

臣說言臣聞勇士冠雞武夫戴鶡推情舉類獲此鬪羊遠生越舊蓄情剛決敵不避強戰不顧死雖爲微物志不可挫伏惟陛下選良家於六郡求猛士於四方烏無遁材獸不藏伎如蒙效奇靈囿角力天塲却鼓怒以作氣前躑躅以奮擊趺若奔雲之交觸碎若轉石之相叩裂骨賭勝濺血爭雄敢毅見而衝冠驚狼聞而擊節冀將少助明主市



駿骨揖怒蛙之意也若使羊能言必將曰苦鬪不解立有死者所賴至仁無殘量力取勸焉臣緣損足未堪履地謹遣男駙馬都尉埶謹詣金明門陳進輕冒宸嚴伏深戰越舉陳寡尤等表

文林郎陳寡尤年六十四

貫滄州

右出身四十餘年懷道抱

德博涉經史白首幽棲不求聞達堪激勵化俗處諫諍之

官幽州節度使參謀劉待授年六十四

貫京兆府

右懷德退靜

立操端確精通術數堪備顧問四品于悉年三十二

貫京兆府

右志定神和學精文遠達皇王正道通古今大義堪拾遺

左右以前幽州都督兼節度管內諸軍經畧大使攝御史大夫燕國公張說奏稱臣身任邊城心在庭闕報國之志莫若進賢勅旨陳寡尤等三人宜並追取試練考覆臣說言知賢不達謂之竊位聞賢而拒是乃蔽君竊位冒也蔽君姦也有姦與冒何以事君臣前歲入朝特蒙顧問聖情側席懼有遺賢臣以寡尤三人上聞天聽中書宣旨取考覆吏部寫勅宣下文書三載於今一人不至夫輕進者是干祿之人靜退者是養高之士天下廉讓之風未長趨競之俗未懲若令所司引試招其隱逸士寧伏死巖穴焉肯

拜侍郎之庭哉徒有薦賢之名竟無進賢之實非朝廷禮  
賢之道豈陛下求賢之心近因奏謁具承天旨請勅州縣  
各以禮徵至京之日中書引見然後付與宰臣請言探蹟  
必有可採寘彼周行如當謬薦罪臣所舉謹錄前舉狀本  
如前

舉陳光乘等表

開元九年正月日洛州臨武縣主簿陳光乘

攝監察御史在河北

夔

州歸州鎮將勤思齊

見在桂州

前申州參軍戴師倩

遭憂在都

勅戴

師倩勤思齊或身自有犯或逆人緣坐未可擢用亦不須

追以前狀準七月二十二日制内外文武職事五品以上  
官有奇材異畧堪任將帥者封狀進内陛下垂心萬機親  
擇將帥欲大頓天綱收羅雲逸今者塞北有屈強之胡漢  
南屯不羈之馬使邊郡憂患朝廷盱食此天下士君子飢  
待虜饁渴待虜血決命於匈奴之時也臣所舉前件三人  
光乘積學而善謀求之古人吳起韓信敵也師情沈勇而  
能斷求之古人彭越吳漢類也思齊忠壯而異材求之古  
人張飛許褚等也皆懷道藏器仰望明時羞自媒衒莫能  
上達臣聞拔人於死者必捨生而報恩榮人於辱者必盡

節而雪恥至如師情思齊亦嘗生竄死地其爲屈辱甚矣如蒙拯將墜之命起已廢之魂一言所及百年可盡凡情尚知此況感激之人哉陛下發使召之旬月可到試以軍事必立奇功若不如所言請受面欺之罪

賀祈雨感應表

臣說言臣聞水旱常數堯湯固有聖賢之理恭潔爲難自冬踰春積陽成亢陛下以時災繫政人患由君退巫女之雩却應龍之請陛下躬自暴露炎景瞻仰雲漢推心引譴爲人受咎誠旣發而動天言剋期而降雨今已霖霖三日

澤漏重泉草樹含欣郊原變色加以雲平雨細氣潤風和  
豈惟優渥王畿必將周遍天下羣心舒釋聖情開暢無任  
萬姓懽悅之至謹奉表陳賀以聞

賀示厯書表

臣說等言內侍尹鳳翔至奉宣聖旨內出新撰厯書二十  
五卷以示臣等竊窺深奧仰觀英華涉海登山罔知攸際  
臣聞唐堯光宅順昊天而定四時虞舜登庸在璿衡而齊  
七政伏惟開元聖文神武皇帝陛下至德廣運文明濬哲  
道冠生知與神合契備往聖之能事紹昔王之闕典發揮

易象以應乘乾之時考正厯書更表履端之始上包二帝  
下括三王徵晷運之盈虛究推步之疎密備稽氣象載躔  
坎離三辰順軌而更明五緯合度而增煥足使天地貞觀  
神人允諧唐虞舊章于斯重覩臣等幸陪書府得預朝門  
抃躍之情實萬恒品謹奉表陳賀以聞

賀大衍厯表

臣說言伏以開元大衍厯天旨裁其紀綱日官考其精要  
履端更始敬授惟新加以辯五行之序推七精之數明徵  
聖期實光土德臣又見梁天監中陶宏景著玉匱記云盛

德木子以肇來運頃者僧一行推璿衡厯得皇家天命成數千年古今祥兆若合符契厯數旣在於聖躬卜年又表於長厯莫大之慶獨冠前王臣忝跡儒林預聞昌運無任抃躍之至謹奉表陳賀以聞

集賢院賀太陽不虧表

太史奏太陽不虧聖德上感變災爲瑞陽光增暉陰慝不作休徵之美莫盛於斯臣等無任欣抃之至謹進狀陳賀以聞謹進

禮儀使賀五陵祥瑞表



右臣等伏以陛下孝通天地親朝五陵拜橋陵則紫氣見  
獲白兔甘露降白鳩巢天光清和日色明朗拜定陵則有  
景雲見甘露降拜獻陵則甘露被樹祥雲抱日拜昭陵則  
先聖見於神游薦享之際陛下親聞歎息初進服用樂器  
自然發聲又素像迴面甘露降滋從祀先臣歷聞蹈舞拜  
乾陵則有靈草生甘露降日抱戴之瑞此皆陛下虔誠上  
感神靈福降四海同歡萬方抃躍臣等幸陪大禮親覩禎  
祥無任大慶之至謹奉表陳賀以聞臣說謹言

請許王公百官封太山表

臣說等言臣聞聖人者與天地合其德故珍符休命不可得而辭鴻名盛典不可得而讓陛下功格上天澤流厚載三五之盛莫能比崇登封告成理叶幽贊故符瑞必臻天意也書軌大同人事也菽粟屢登和平也刑罰不用至理也今陛下稽天意以固辭違人事以久讓是和平而不崇昭報至理而闕薦祖宗億兆之情猶知不可況上帝臨照祖宗顧諟其可止乎願納王公卿士列嶽縉紳之衆望迴命有司速定大典臣等不勝懇禱敢昧死再拜上言

請八月五日爲千秋節表

左丞相臣說右丞相臣璟等言臣聞聖人出則日月記其  
初王澤深則風俗傳其後故少昊著流虹之感商湯本元  
鳥之命孟夏有佛生之供仲春修道祖之籙追始尋源其  
義一也伏惟開元神武皇帝陛下二氣含神九龍浴聖清  
明總於玉露爽朗冠於金天月惟仲秋日在端五恒星不  
見之夜祥光照室之期羣臣相賀曰誕聖之辰也焉可不  
以爲嘉節乎比夫曲水禊亭重陽射圃五日綵線七夕粉  
筵豈同年而語也臣等不勝大願請以八月五日爲千秋  
節著之甲令布於天下咸令宴樂休假三日羣臣以是日

獻甘露醇酎上萬歲壽酒王公戚里進金鏡綬帶士庶以  
絲結承露囊更相遺問村社作壽酒宴樂名爲賽白帝報  
田神上明元天光啟大聖下彰皇化垂裕無窮異域占風  
同見美俗

請置屯田表

臣說言臣聞求人安者莫過於足食求國富者莫先於疾  
耕臣再任河北備知川澤竊見漳水可以灌巨野淇水可  
以漑湯陰若開屯田不減萬頃化萑葦爲秔稻變斥鹵爲  
膏腴用力非多爲利甚溥諺云歲在申酉乞漿得酒來歲

甫邇春事方興願陛下不失天時急趨地利上可以豐國  
下可以廩邊河漕通流易於轉運此百代之利也當今國  
儲未贍邊軍未息靜人業農願留聖意亦嘗賜前階之食  
承後騎之顧竟唯唯而無一言者豈敢隱情於聖主也正  
以職在仗衛憂於部伍馬上非公議之所囿遊非朝廷之  
事今昧死上愚見乞與大臣籌謀速下河北支度及溝渠  
使檢料施功不後農節謹附賀正使隨軍前曹州考城縣  
尉同希再奉表以聞謹言

駁行用魏徵注類禮表

今之禮記是前漢戴德戴聖所編錄歷代傳習已向千年  
著爲經教不可刊削至魏孫炎始改舊本以類相比有同  
抄書先儒所非竟不行用貞觀中魏徵因孫炎所修更加  
整比兼爲之注先朝雖厚加賞錫其書亦竟不行今行沖  
等解徵所注勒成一家然與先儒第乖章句隔絕若欲行  
用竊恐未可

爲建安王謝賜衣及藥表

臣某言伏奉某月日恩勅賜臣衣及藥渥流璿極彩溢旌  
門拜捧戴舞載欣載越臣受律虧方扞城無寄偏師不振

逋寇仍滋進慙計日之功退積踰時之咎誠合歸罪司寇以厭深責豈圖天寵猥臨宸慈寬假當從褫服轉承且吉之衣宜肆典刑翻加有喜之藥毀車夷馬復振鑾和窮炭枯莖重敷榮燄跼影邊塞馳心闕一城微命易投生成難謝無任感戴之至

謝觀唐昌公主花燭表

臣說言內侍尹鳳翔宣勅賜臣觀唐昌公主花燭伏以天人下嫁王宰送行苟非榮寵何階瞻望臣免歸餘叟忽承朝請之恩廢駕羸驂復覩肅雝之禮鴻私所被枯瘁生光

無任歡荷之至謹奉表陳謝以聞

荊州謝上表

臣說言伏奉二月二十五日制書除臣荊州大都督府長史受命荒服浮舟遄泝以今月十七日到州上訖山列楚望水橫南紀德非羊祜迹謝宋均何以鎮靜流亡攘除猛虓臣說中謝臣宿濫宸眷累塵榮獎福過生災至剛多缺及一辭庭闕已涉五年不有自白之書竟無因人之請天光獨照雲霧頓披窮鱗更躍鍛翮仍翥揣分瞻恩何階及此媿乏才能不足宣暢皇風敢竭心力少冀上酬元造無



任欣抃兢惕之至謹附送丁匠資使所部文林郎守公安縣主簿封希魯奉表陳謝以聞

岳州刺史謝上表

臣說言伏奉四月十有二日制書除臣岳州刺史某月二十七日遞書到相州承恩惶怖狼狽上道以月一日至岳州上訖臣以昔侍金華過蒙榮寵負乘招寇日待譴黜聖慈遲回仍委符守刻肌刻骨誠願上報恩私無術無才將何克宣風化夙夜慚惕胡寧啟處伏以貶官到任理在速聞不敢循常稽緩附使無任荷恩兢懼之至謹遣遞表陳

謝以聞

謝修史表

臣說言伏奉今月十六日勅令臣在家修史捧恩戴命且喜且慙臣服道儒門策名昌運掌綸四后載筆三朝階緣宿遇踐躡端揆職爲劇而心盡史無閑而功廢自貽官謗待罪私門反魯之感特深藏周之望已絕豈意特流天旨重緝簡書雖才慙左馬而時盛周漢況復編堯舜之年事皆目覩敘義黃之德言匪傳聞善志將訓於百王實錄可貽於千古國家之鴻業辦矣朽臣之志願畢矣不勝天恩

難任之至謹奉表附內侍尹鳳祥陳謝以聞

謝賜碑額表

臣說言伏奉今日恩旨賜先臣碑額悲荷交心拜捧以泣  
臣某中謝臣亡父先臣隲安貞下位不待昌辰先帝贈之  
以專城陛下目之以積善光賁重渥感慶三泉舉宗悲喜  
外姻歡賀昔孔篆吳札之墳秦存里子之壟事輕列國義  
小陪臣豈若天王禮士鳳書旌墓榮軼曩賢道映來籍在  
臣在子移孝爲忠心効草木何酬雨露無任幽明感戴之  
至謹奉表陳謝以聞

謝問表

臣說言內給事高力士至伏奉墨制聖慈綢繆言及舊昔  
拜舞捧讀且驚且喜臣聞漢主眷驂乘之臣魏君憶同遊  
之客誠以故舊不棄而光陰易往今之聖情實過於昔臣  
曩蒙侍文北閣陪宴東堂庭闕一遙寒暄二載不意逢春  
之草承湛露之惠渥容光之隙引遲日之暉華無任荷恩  
戀主之至謹附高力士奉表陳謝以聞

謝賜藥表

臣說言去年某月日於右銀臺門蒙天恩引對特賜慰問

攝理無方以致熱疾緣在假內不敢奏聞聖慈憂軫詔使  
臨門伏枕在床雖氣體未適趨風拜命覺腠理遂平恩榮  
豈止於邱山朽質永延於龜鶴無任感戴之至謹奉表陳  
謝以聞

謝賜鍾馗及歷日表

臣某言中使至奉宣聖旨賜臣畫鍾馗一及新歷日一軸  
者猥降王人俯臨私室榮鍾睿澤寵被恩輝臣某中謝臣  
伏以星紀迴天陽和應律萬國仰維新之慶九霄垂湛露  
之恩爰及下臣亦承殊賜屏祛羣厲續神像以無邪允授

人時頒歷書而敬授臣性惟愚懦才與職乖特蒙聖慈委以信任旣負叨榮之責益懷非據之憂積愧心顏難勝惕厲豈謂光迴蓬華念等勲賢慶賜之榮賤微常及感深犬馬戴重邱山無任感荷之至

謝京城東亭子宴送表

臣某言力士至奉宣勅以臣臨岐特令賜宴恭承惠渥念及庸微天地同仁木石知感不勝惶悚戴荷之極臣某中謝臣歷觀自古君臣凡所際會或因緣黨進或延接功成故未竭而知不言而信豈有地孤援寡毀衆謗深察蒙蔽

卷之三  
三  
之中致曠蕩之外逢陛下特達之遇當陛下聖明之朝事  
出非常澤深恩重今者誓將瀝血未足竭誠徒欲殺身豈  
能報德至如勵精勤政與直守公酬陛下憂人之心行陛  
下宏道之化安敢失墜以負神明但函關路遙長安日遠  
不任戀主悽愴之至

郊祀燔柴先後奏

徐堅等所議燔柴先後議有不同據祭義及貞觀顯慶已  
後旣先燔若欲正失禮求祭義請從貞觀禮如且因循不  
改更請從顯慶禮凡祭者本以心爲主心至則通於天地

達於神明既有先燔後燎自可斷於聖意所至則通於神明燔之先後臣等不敢裁定

諫避暑三陽宮疏

右補闕臣說言臣聞明主不惡切諫以博覽忠臣不敢隱忠以曲辭伏願陛下特加裁察臣說誠惶誠恐頓首頓首死罪死罪陛下屯萬乘幸離宮暑退涼歸未降還旨愚臣固陋恐非長策請爲陛下陳其不可三陽宮去洛城一百六十里有伊水之隔崿坂之峻過夏涉秋水潦方積道壞山險不通轉運河廣無梁咫尺千里扈從兵馬日費資給



連雨彌旬即難周濟陛下太倉武庫並在都邑紅粟利器  
蘊若山邱奈何去宗廟之上都安山谷之僻處是猶倒持  
劍戟示人鐔柄臣竊爲陛下不取夫禍變之生在人所忽  
故曰安樂必戒無行所悔此不可止之理一也告成編小  
萬方輻輳填城溢郭併插無所排斥居人蓬宿草次風雨  
暴至不知庇託孤嫠老疾流轉衢巷陛下作人父母將若  
之何此不可止之理二也造設奇巧誘掖上心鑿山疏觀  
竭流漲海俯窮地脉仰出雲端易山川之氣奪農桑之土  
延木石運斧斤山谷連聲春夏不輟勸陛下作此者豈正

人邪詩云人亦勞止汔可小康此不可止之理三也御苑東西二十里所出入來去雜人甚多外無牆垣局禁內有榛藪谿谷猛獸所伏暴慝是憑陛下往往輕行警蹕不肅厯蒙密乘險巇卒然有逸獸狂夫驚犯左右豈不殆哉雖萬全無疑然人主之動不宜容易也易曰思患豫防願陛下爲萬姓持重此不可止之理四也今國家北有胡寇覲邊南有夷獠騷徼關西小旱耕稼是憂安東近平輸漕方始臣願陛下及時旋軫深居上京息人以展農修德以來遠罷不急之役省無用之費澄心澹慮惟億萬年蒼蒼羣

金史卷之二十三  
生莫不幸甚臣自度芻議十不一從何者沮盤遊之娛閒  
林止之翫規遠圖而替近適要後利而棄前驩未沃明主  
之心已捩貴臣之意然臣血誠密奏而不愛死者不願負  
陛下言責之職耳輕觸天威伏地待罪

諫潑寒胡戲疏

臣聞韓宣適魯見周禮而嘆孔子會齊數倡優之罪列國  
如此況天朝乎今外蕃請和選使朝謁所當接以禮樂示  
以兵威雖曰戎夷不可輕易焉知無駒支之辯由余之賢  
哉且潑寒胡未聞典故蹀躞體跳足盛德何觀揮水投泥失

容斯甚法殊魯禮褻比齊優恐非干羽柔遠之義樽俎折  
衝之道願擇芻言特罷此戲干冒宸極伏深戰懼

欽定全唐文卷二百二十四目錄

張說 四

論幽州邊事書

論神兵軍大總管功狀

賀彩雲見狀

賀破吐蕃狀

謝賜撰鄭國夫人碑羅絹狀

集賢院謝示道經狀

謝賜御書大通禪師碑額狀

謝賜藥狀

祭天不得以婦人升壇議

重定南郊星辰位次議

神龍享廟習樂議

改撰禮記議

對詞標文苑科策

第二道

第三道

與鄭駙馬書

與執政書

與褚先生書

與鳳閣舍人書

與魏安州書

與營州都督弟書

弔陳司馬書

上東宮請講學啟

欽定全唐文卷二百二十四

張說 四

論幽州邊事書

臣頓首死罪皇帝陛下先帝以臣踐履忠孝使臣啟發聖明故得侍讀春宮夙承天眷景雲中歲兼掌樞衡內當沸騰之口外禦傾奪之勢陛下監撫旣安自天所祐臣協贊之意明神啟之開元之始首典鈞軸智小任大福過災生出守三州遠離六載曲直非已并降由人惟君知臣事不待說今改秩邊鎮委重戎麾竊以兩蕃近和能無同異九



姓遠附未聞撫納欲恃賊殺無侵擾之慮保寧兩蕃受徵發之盟臣愚料之恐未然矣何者賊殺新立必逞兵威賊兵所加必收九姓九姓若去兩蕃搖矣九姓雖屬并州節度然共幽州密邇脫有風塵何事不至臣熟聞幽州兵馬寡弱卒欲排比未可即戎城中倉糧全無貯積設若來迫臣實憂之伏乞聖慈深以垂意博詢舊將豫爲籌畫若早圖之必無後悔且孤臣總衆易起猜疑寬大失濟事之宜嚴整招怨黷之謗遠辭天聽臨路徬徨如有論告臣身奏効軍事者乞追臣面問對定真虛則日月無可蔽之期幽

遠有自通之望伏願留書在內時加矜察

論神兵軍大總管功狀

右被牒奉勅責通大總管功狀者自契丹背恩營州失守  
前軍喪律榆關不開幽平烏棲於重壑戎羯虎食於四野  
燕南諸城十僅存一河朔之地人挾兩端由是豺狼入於  
牢穽蜂蠆出於懷袖王受服不宿孤劒先驅寇讎日深甲  
兵未繼於時鳩合步騎不滿三千彼衆我寡兵怯虜熾且  
保關守塞力猶不禦況土人弄兵轉相攻拔外召夷狄內  
據險隘冀州旣陷勢將不已當決水之衝承烈火之焰逆

風撲燎摧岸塞河韓白見之知其難矣王權以料敵靜而  
鎮下宣國恩以撫寧曉愚俗以逆順督將吏以忠義示士  
伍以嚴肅深籌秘於六奇潛檄通於千里滄瀛貝博響援  
增氣幽易恒定聲威有立而又分兵井陘杜其西望引軍  
河漕阻此上流張虛旗於趙城設奇兵於襄國亦猶吳人  
潛軍於巢縣而見舟豫章漢將捷徑於武關而聲出崤澠  
蓋廣援以安衆多方以悞敵故能舉無遺策兵不踰時滌  
昂宿於妖氛拔冀方於塗炭俾皇靈溥暢黔首昭蘇朝廷  
釋東顧之憂漳滏息南侵之患然後歸剽掠返流亡業窮

乏眠瘕傷僵暴皆掩死喪復怨賞不失勞亦無濫受罰不  
漏罪亦無冤人則王有大勲於是役也而又誠以奉上義  
以利人至忠之狀有二爲善之迹有五所謂忠者一曰思  
致命也初戎寇方殷王乘驛赴救衆纔數騎捍敵羣醜山  
東父老如恃山河旣而王躬擐甲胄吐誠師旅誓在盡敵  
以報前讎故得感激來戰決命爭勝二曰能果斷也凶黨  
狂狡飛轉妖書吠堯謗舜閒誘愚惑事斯蔓結揺我人心  
王陰察州閭掩求魁蠹獲應賊書人耿羅漢等一十三人  
焚書伏罪衆而後定故得破謀殺謀悖計無施三曰誠感

神也王地維近屬躬當大任所過山川鬼神之地罔不精  
意懇禱以請云天子聖明皇天輔德實降靈助以濟神兵  
幽感明祇多獲孚祐故得行師之處勝風送旗合戰之時  
興雲翊陣金鼓所向冰消草靡所謂善者一曰均下也飲  
食勞逸與將士必同二曰潔己也徧賞有功王秋毫無受  
三曰詢善也國之彝典成誦在心閱實定名必諮羣議四  
曰嫉惡也每戮一人親數其罪必深加咎責使愧恥於地  
五曰不伐也賊平之日將吏賀功王稱美天威推勞士衆  
兢兢然若不己有也惟聖人神武制命豫授兵符惟大總

管忠善龔行克成廟筭今者顯號年紀騰輝國籍方謂垂  
範雲臺勒功彝器而杅杜遣宴甫率於舊章茅土增封殊  
末於宗正此壯夫義士所以竊議而長歎者也雖樹下不  
言用歸功於明主然策勲有典何勸善於戎臣敢憑下問  
是用大陳其所正復州縣招撫歸降補署官僚存集流迸  
擒殺凶醜收獲軍實與吏士共功者具如別狀

賀彩雲見狀

右伏奉恩旨今日屬下元賜臣等侍從升降聖闕禮謁大  
聖尊容行香之際日西南有彩雲見者伏以大道無形至

誠斯應上元降福感而遂通步輦涉於齋宮虔修香火彩  
雲生於曉日遽發祥光是知聖德與天心合符萬靈與羣  
仙叶贊臣叨倍侍從如昇汗漫之遊承恩禮謁更覩氤氲  
之瑞榮幸之極千載一時無任欣慶之至

賀破吐蕃狀

右臣等伏以涼州遙稟神筭大振天威吐蕃小醜應時摧  
敗元惡渠魁乘勢俘戮隻輪匹馬坐見無遺雖虞舜之格  
有苗黃軒之征涿鹿未有廓清氛祲如今日之盛者臣等  
無任慶快之至

謝賜撰鄭國夫人碑羅絹狀

右內侍尹鳳翔宣口勅得所進闕羊表及鄭國夫人碑今  
賜卿綵羅二十匹絹一千匹者伏以闕羊薄技恩感戰士  
之心雕蟲陋詞媿稱賢母之德効輕賞重戴厚慚深臣子  
之情豈望天報

集賢院謝示道經狀

右臣伏見聖札金字八分寫道經兩卷以爲惠文太子三  
七追福天毫發彩宸翰騰輝色麗風雲光逾日月伏惟陛  
下孝弟之至通於神明俯念天倫用資幽贊當茲炎暑服



此勤勞事絕古今感深名教臣忝司右職載考前王未有親親之至楷隸之美如此之備也足以作則貽範垂之無窮伏望宣付史館以光典策無任誠懇慚惶之至

謝賜御書大通禪師碑額狀

右內侍尹鳳翔宣示御書大通禪師碑額六字畫起平雲點蹲芒玉戈矛攢倚鸞鶴交飛神功發於至想睿思成於元德實謂天龍捧持虛空稱贊逝者如在薦福知歸臣棲志禪門撰碑靈塔幸遇聖情崇道御書假貸刻星辰於嘉石爛日月於封邱感極悲生恩深無荅臣無任望外殊澤

之至

謝賜藥狀

右內使陳忠盛宣旨賜臣痢藥臣攝生無方自遺疾疢聖  
慈矜憫垂恩救護氣衰力憊忽吞永命之符腸滑胃虛更  
餌返魂之草蒙天營佑指日痊平雖萬粉灰何酬造化謹  
附忠盛奉狀陳謝以聞

祭天不得以婦人升壇議

乾封舊儀禪社首享地祇以先后配饗文德皇后配地祇  
天后爲亞獻越國太妃爲終獻以宮闈接神有乖舊典上

元不祐遂有天授易姓之事宗社中圯公族誅滅皆由此也景龍之季有事園丘韋庶人爲亞獻皆以婦人升壇執邊豆滌瀆穹蒼享禮不潔未及踰年國有大難亞獻終獻終受其咎平座齋郎及女人執祭者多亦天卒今主上尊天敬神必須革正斯禮請以睿宗大聖真皇帝配皇地祇侑神作三獻禮上初獻邠王守禮亞獻宋王成器終獻

### 重定南郊星辰位次議

晉元帝建武二年定郊禮於建業之南去城七里一壇之上尊卑雜位千有五百神去聖日遠損益不同臣等按祠

令五星已下內官五十三座中官一百六十座外官一百  
四座衆星三百六十座臣共所由勘史傳及星經內外所  
主職有尊卑舊圖座位升降頗錯今奉墨勅授尊卑升降  
又新加降等座總三百一十九座并衆星三百六十九座  
凡六百八十八座具圖如左

神龍享廟習樂議

吉凶異儀降殺殊節以日易月自久之其在凶時不可  
言祭祀旣祭之後不可存凶事若祭而廢樂吉不除凶是  
五禮交亂而吉凶駁雜夫王者奉神祇承宗廟二至郊祀

四時烝嘗鼓鐘所以格上下之神舞詠所以象祖先之德  
於其有祭不可闕也今山陵已畢清廟旣祔於禮則吉祭  
於時則踰年宜遵漢禮以復常度請舉永徽故事以行先  
朝之典謹議

改撰禮記議

禮記漢朝所編遂爲厯代不刊之典今去聖久遠恐難改  
易今之五禮儀注貞觀顯慶兩度修前後頗有不同其中  
或未折衷望與學士等更討論古今刪改行用

對詞標文苑科策

問朕聞立極開基之主經文緯武之君莫不法象殊流汚  
隆異制至於安人導俗咸即運以垂芳緝化宣風各因時  
而播美是以道孚繩木爰膺九翼之年圖祕龜龍用啟六  
爻之代窮桑御歷狎威鳳以踐司軒邱列位因景雲而命  
職徵汾陽之跡則十政方凝俯河濱之化則四門攸闢祥  
披玉斗理九土以興功祚徙金精調五聲而作教周崇六  
禮仁義之道爲先漢設三章皇霸之圖斯雜皆所以牢籠  
八際隲括三靈齊四大以居尊協五神而稱正且隨時之  
義既不相沿師古之言又聞前誥朕欽承先聖對越上元

當宁興懷鎮切推溝之慮凝旒結想方深馭朽之情思所以式展宏猷勉康庶績而撫茲薄德昧此永圖爾等積學多聞含章獨秀未顯疇庸之德宜申待叩之音適時之務何先經國之圖何最帝皇之道奚是王霸之理奚非佇聽良謨朕將親覽

對臣聞舜命昌言漢徵極諫嘗覽千古賢哉二君今陛下發德音下明制選空巖穴訪匝輿臺大哉邈乎過之遠矣臣以草莽之賤謬當車乘之招誠不足以庶幾王庭充塞大問伏讀聖旨乃知天情之所存焉臣聞昔者鳥跡代繩

龍文演卦水土遷王時更萬祀金木互興人非一姓暨乎  
三皇五帝氏往夏商周漢氏作或導人以禮樂或驅俗以  
政刑或革弊以忠敬或沿風以文武非師古之誥有殊蓋  
隨時之義異也伏惟聖母神皇陛下誕受鴻基光膺駿命  
粵若立極格天之業論道布政之典任賢克暴之功出洛  
飛雲之瑞此並藏緯玉冊勒休金版鬱美前古揚光後葉  
者矣至若創業垂統之則宏猷永圖之義重光三聖再清  
六合可不謂然乎猶或惕慮推溝勞謙馭朽謝文明於薄  
德想疇庸於清問此陛下之至讓也愚臣何足以知之策



曰適時之務何先經國之圖何最臣聞古者因人以立法  
乘時以設教以義制事以禮制心夫人者理得則氣和業  
安則心固崇讓則不競知恥則遠刑若強人之所不能雖  
令不勸禁人之所必犯雖罰且違故曰政不欲煩煩則數  
改數改無定人懷苟免之心網不欲密密則深文深文多  
傷下有非辜之懼竊見今之俗吏或匪正人以刻爲明以  
苛爲察以剝下爲利以附上爲誠綜覈之司考課專於刀  
筆撫字之宰職務具爲簿書陛下日昃維勤守宰風化多  
闕臣以爲將行美政必先擇人失政謂之虐人失人謂之

傷政捨人爲政雖勤何爲伏願陛下進經術之士退掊克之吏崇簡易之化流愷悌之風畫一成歌此適時之務也慎賢而用此經國之圖也苟能英才不棄大化方隆而猶曰朝謝垂衣野非擊壤則文武之道尚何言哉堯舜之君徒虛語耳策曰帝皇之道奚是王霸之理奚非者布在方策臣聞之矣皇人御歷上淳而下信帝者膺期君明而臣哲周用王道教化一而人從漢雜霸道刑政嚴而俗僞故親譽優於畏侮文景劣於成康臣謹對

## 第二道

問朕聞禮崇三典方宏慎罰之規書著五刑不以深文爲義朕母臨赤縣子育黔黎夏日貽憂懼青牛之結氣秋荼軫念慮丹筆之成冤然以人尚掛於湯羅情倍深於禹泣頃者荆郊起祲淮服挺妖朕惟罪彼元凶餘黨並從寬宥今敬眞之輩猶蘊狠心不荷再生之恩重構三藩之逆還嬰巨釁便犯嚴科豈止殺之方乖於折衷將小慈之澤爽彼大猷子大夫等學富三冬才高十室刑政之要實所明閑傾此虛襟佇聞良說

對臣聞刑以助教德以閑邪先王慎於好生大易誠於緩

死今陛下母臨黔首子育蒼生孚佑下人克配上帝然有  
東南小祲荆蠻遠郊雖聖德泣辜尚用防風之戮天心罪  
己仍勞淮甸之征其有詿誤閭閻脅從井邑陛下愍孤孀  
於海淮恤困窮於江漢捨從寬宥此陛下之恩也而叢爾  
餘孽蠹茲頑兇思弄兵於潢池之下將構難於戎狄之域  
罪盈稔貫禍得萌芽此又陛下之明也今陛下乃賜臣策  
曰豈止殺之方乖於折衷將小慈之澤爽彼大猷臣實見  
折衷大猷之規不知小乖微爽之義也策曰政刑之要實  
所明閑臣聞政猶水火刑譬陰陽頃者三監亂常有司既

糾之以猛於今四罪咸服陛下宜濟之以寬明肆赦之渥  
恩安萬人之反側布深仁於羅鳥收至察於泉魚豈不大  
哉天下幸甚且夫人者吐也暗而不可罔庶者衆也愚而  
不可欺是故刑在必澄不在必慘政在必信不在必苛故  
明王之理天下也刑一則人畏而不敢干政簡則俗齊而不  
僞於是禍亂不作災害不生君安於上臣悅於下百姓日  
用而不知其然四海風動惟帝之則道暢鍾石聲流舞詠  
其行已也非他所理人者以此刑政之要庶幾一隅臣謹

對

### 第三道

問朕聞仰觀乾象房心爲布政之宮俯察坤元河洛建受圖之所是以上稽珠緯佇風雨之和下表圭塵均遠近之節定都考室斯焉是崇顧以庸虛忝膺大寶乾乾夕惕每軫納隍之懷懍懍宵興恒勞馭朽之念而昊穹眷命靈貺屢彰雲構旣隆天城斯畢是用內省多愧上荅逾勤將欲殷薦有常嚴配不墜光啟惟新之躅申明祀典之方順四時以布和風考五物而行正氣盛禮之要猶慮未宏爾等並積學基身含章表質或遠從賓貢聲滿於州閭或遐應

搜揚譽光於朝選採皇王於奧旨援周漢之前蹤蘊彼曾襟咸應備曉未知何代之政參詳適中何禮之規施用爲切務存必簡之道式崇可久之基試陳嘉謀爾其揚摧思擢太常之第副朕求賢之懷

對伏惟陛下則天法地畏命重人據河洛之規模總風雨之交會軒后魚圖之水建邦設都周公龜墨之地考堂作室靈祇降福嘉祥薦祉制同神造力以子來將以殷薦上帝至法也嚴配先王至孝也加以八風攸序四時克諧無得而稱能事畢矣猶復執勞謙之不已懼盛禮之未宏訪

末學之臣詢稽古之政斯事體大臣何足言然而敢不欽承以竭涓滴耶策曰何代之政參詳適中何禮之規施用爲切臣謹錯綜三五明徵典謨竊以緯武經文布方策而非遠英風顯號流頌聲而可襲未有反義悖德而致昇平之政棄禮違經以克永終之祿莫不發號施令法乾坤之動靜執契懸衡順金木之刑德是故青陽元室遵孟仲而觀風白輅朱旂因離兌而布政養老用上庠之禮教胄取大學之義環水著辟雍之名向陽表明堂之位蓋所以享羣瑞朝諸侯頒正朔調景緯成簡易之基崇久大之業也



皇王奧旨庶此詳探周漢前蹤固難專用臣才智駑劣草莽鯁生至如軍國務廣政刑理急但至敬無文信言不美陛下欲聽其說必觀於事將達其謀先求諸道危言抵禁破膽寒心伏惟聖主稍留天聽臣謹對

與鄭駙馬書

晚尋莊周書以天地爲國道德爲身老室之戶牖孔門之棖闌足可反覆孝慈胎育仁義而晉朝賢士乃祖尚浮虛弛廢禮樂其所遺失將詣真宗不愈遠也老稱歸根曰靜復命知常復命近於無有知常其有知見耶斯故反照爾

孔云窮神知化德之盛者神不可窮而窮之是神合於我  
化不可知而知之是化爲我用惟此二義繫莊生亦未始  
盡言焉非滎陽之深於道者孰爲輕導茲意也

與執政書

說拙於守身往年遷流嶺外亡親愁懼痼疾增加比蒙生  
還曾未數歲家口在洛身徒入京及丁兇苦不獲侍側比  
於他人情實不等在禮君親同貫事君無負事親有負不  
能殺身以自咎責乞過祥禪報國非遲三度表請不蒙矜  
遂當是文墨不盡苦心投之執事乞爲一言聞達不敢守

禮抗請直是私情乞恩若以此情可矜猶冀聖人萬一哀憫若將譴越甘心待罪謹狀

與褚先生書

說拜白薊北餘沍關西早春物候所宜年來共感惟先生進經玉殿退食金門黼藻元猷榮問清暢甚善說往陪君子視學瑤山中貽官謫謫居湘浦賴聖主識其面目憐其宿心捨衆口之無稽容庇身之有地自授軍鎮躬當夷狄出入以馳突爲羣坐臥以戈劍爲友翰墨都廢典籍生塵時憑夢魂一見宮闕每憶朝侶邈若雲天愧乏武才供國

羸使豈望立明主之側陳先王之道哉說與先生事願乖  
矣曩喜同席今嗟異鄉遐路三千曷其言會強飮安步爲  
國師臣時流德音以惠疆場張說再拜

與鳳閣舍人書

范陽張說謹上鳳閣舍人公足下竊聞高義遠矣願託下  
風久之自非氣以同求音爲賞奉降此已往復何云云昔  
有飛英子處於深林俘轉溝壑適遇靈風子出於大塊將  
獵雲霄飛英子思欲遊焉揚袂大呼請俱載矣靈風子不  
知其人也怒氣視叱而還之飛英子曰吁子非至公也夫

至公也者以義而求之以仁而與之況乃假有餘之資濟  
無階之望施不費之惠振將墜之魂子不濫吹我無苟進  
此種德也夫何拒焉靈風子曰請受教遂相與翻飛而行  
搏扶而上經乎綺閣集乎瑤臺簸芳萬里騰景千仞旣而  
靈風子卒無德色飛英子亦無私心今明公據清風之資  
令賢者獲飛英之託此至公也得無嫌揚袂之謁懷怒氣  
之疑乎且夫論美聲者不於清泝之室議絕足者不於王  
良之門今東蘊知歸彈冠且衆若公固讓而不然之彼亦  
將倚輶於遠方闕於天下矣輕重十倍去留一言惟君處

之張說再拜

與魏安州書

說白尊豫州府君德業高遠名言路絕豈說常詞所堪碑  
紀比重奉來旨力爲牽綴亦不敢假稱虛善附麗其迹雖  
意簡野文朴陋不足媚於衆眼然敢實錄除擅釀亦無愧  
於達旨今手寫裝本來使齋縑馬何爾踈外通財不謝故  
無辭却甚熱願履恒休張說白

與營州都督弟書

骨肉世踈居止地濶宗族名迹不能備知讀厭次府君狀

已具歷官未書性習夫五常之性出於五行稟氣所鍾必有偏厚則仁義禮智信爲品不同六藝九流習科各異若以稷禹之事贊於巢由孫吳之術銘於游夏必將神人於悒未以爲允今之撰錄蓋欲推美實行崇識素心先德怡神於知我後生想望於見意說爲他人稱述尚不敢苟況於族尊行哉往來信多直䟽早報冬末寒沍野有戎歌山無夏草步步日遠能無鄉國之心乎荒州新立向者未有一下車殊俗意緒如何說患恒服湯虛多健少因別奉去說

呈

弔陳司馬書

正月癸卯孤子范陽張說頓首頓首陳君之靈頃伏苫蓋  
遠辱慰䟽執對號慟次於展洩來使未還傳君遇禍盡哀  
寢外傷心痛骨明府兄毓德南邦飛聲中夏急人之急憂  
人之憂勇於履危果於從政入使天闕有專對之美按俗  
交州見澄清之節故得振衣衡管割錦閩鄉越嶂舊風人  
狃輕剽振之以淳俗格之以華章矯枉過中斯害也已齒  
由剛折膏爲明銷嗚呼陳君婞直而殞皇天輔德問之何  
故疇昔炎海契濶周旋義則友朋恩結兄弟方期歲暮韡



韓相榮元髮未華何圖零落山濤猶在嵇紹不孤逝者有  
知當昭是意今返防關力報前書幽明雖異交友無改悲  
言下筆涕泗從之并往千錢俾陳奠醑獻款萬里哀哉柰  
何頓首再拜

上東宮請講學啟

臣某等啟臣聞安國家定社稷者武功也經天地緯禮俗  
者文教也社稷定矣固寧輯於人和禮俗興焉在刊正於  
儒範順考古道率由舊章故周文王之爲世子也崇禮不  
倦魏文帝之在春宮也好古無怠博覽史籍激揚令聞取

高前代垂名不朽伏惟皇太子殿下英睿天縱聖敬日躋  
神筭密發雄威立斷廓清氛祲用寧家國兆人由是歸德  
六合所以推功主鬯青宮固本也分務紫極觀政也副羣  
生之望作累聖之儲殿下之於天下可謂不輕矣監國理  
人可謂至重矣莫不拭目而視清耳而聽冀聞異政以裨  
聖道臣愚伏願崇太學簡明師重道尊儒以養天下之士  
今禮經殘缺學校淩遲歷代經史率多紕繆實殿下闡揚  
之日刊定之秋伏願博採文士旌求碩學表正九經刊考  
三史則聖賢遺範粲然可觀況殿下至性神聰留情國體

幸以問安之暇應務之餘引進文儒詳觀古典商略前載  
討論得失降溫顏聞讜議則政途理體日以增益繼業承  
祧永垂德美臣等行業素輕藝能寡薄顧慙多士叨侍宮  
闈日夜祇懼無以匡輔區區微誠願効塵露輕進芻鄙望  
垂採擇臨啟如失伏用兢惶謹啟